

671.1267
078
10

卷之九

人物志
亭

武功 孝友

善行 義烈

方技 耆壽

仙釋 僑寓

大城縣志

大城縣志卷之九中

武功志

記曰文王以文治武王以武功孔子曰有文事者必有武備則武功之事重矣明季重文而輕武是以淪胥我朝武職與文職並重洵千古不易之大法也平舒武職諸人類能爲國效命增闔邑光故志之

張暉傳

宋史第三十一卷

元右丞相脫脫

張暉幽州大城人後唐清泰初隸控鶴軍累遷奉國弩手都頭晉開運末與武行德奪契丹甲船於河陰行德領河陽以暉爲弩手指揮使復令引兵趣懷州契丹將

遁去因領州軍漢祖入汴暉迎於滎陽授懷州刺史慕
容業治多不法以暉爲緣漢都巡檢使領唐州屯兵至
郢州卽代業還京改郢州刺史周廣順初劉崇寇晉絳
召暉爲步軍左箱排陣使師還改沂州刺史三年吏民
詣闕舉留俄改冀州會詔築李晏口束鹿安平博野百
八橋武强等城命暉護其役踰月而就從世宗征淮甸
充壕砦都指揮使旣拔楚泗卽授泗州未幾改耀州俄
爲西南面橋道使宋初從征澤潞爲行營壕砦使先登
陷陣事平遷華州團練使在郡頗有治狀建隆二年太
原未下詔入覲問計暉對曰澤潞經李筠之叛瘡痍未

復軍旅一興恐人力重困不如戢兵育民俟富庶而後
爲謀乃賜襲衣金帶鞍勒馬令還州朝廷方議伐蜀遷
鳳州團練使兼緣邊巡檢壕砦橋道使暉盡得山川險
易因密疏陳之太祖覽之大悅乾德二年大軍西下乃
以暉充西川行營先鋒都指揮使督兵開大散關路躬
撫士卒且役且戰人忘其勞十二月至青泥嶺卒天禧
五年暉妻年百五歲家貧詣闕自陳詔賜束帛錄其孫
承德爲三班借職

論曰晦於危時則有陷陣之功平日則獻息戎之諫其
忠誠勇果率有可尙者焉

張得祿傳

王玉麒

邑人

張得祿字梅臣大城王家口人回回籍幼聰穎善機變初爲傭能得主人歡好習字喜騎射性孝友人皆重之咸豐三年隨其兄充順天募勇爲曹帥克忠所賞識時勝宮保爲統帥偶至營回話頗合上意留充噶什保至參將補涿州到任年餘調赴奉天隨王幹青左冠廷兩軍門立功簡放廣東高州鎮總兵署理潮州鎮總兵卒於官

王永慶傳

王玉麒

邑人

王永慶字鶴軒東岳莊人家貧無賴咸豐三年投營爲

勇性悍善鬪罔識尊卑以故屢在前敵殺賊未得保舉
嗣僧親王親見其奮勇始予以功牌屢立功保至守備
後歸勝宮保營與王恩第宋景詩張得祿等同事戰功
卓著保至副將銜爽勇巴圖魯因王恩第犯營規被勝
帥號令示衆宋景詩約與同叛公大罵欲刃之景詩遁
走勝疑宋叛爲公所激公不自安遂往陝西投金將軍
爲先鋒官每戰必捷所帶五百兵俱著紅衣旗幟畫飛
虎故名飛虎隊紅孩兵賊見旗卽遁克復城池無算陝
西爲立生祠數十處放甘州實缺副將而驕傲不訓之
性無少減漫罵無禮動輒殺人不知情理法度之謂何

以事左降署河南嵩縣守備因鐵匠二名在屏門張望
遂手刃之事聞解任見當路猶自辯無過不遜已極繫
於獄後流賊張洛行賴文光任柱苗沛霖等肆擾河南
通省幾無甯宇逼近省城當路許其帶罪立功出於獄
趕造飛虎旗挑壯勇千名仍著紅衣出隊一戰而捷不
旬日而賊遁無踪當路驚喜非常正欲修章奏保開復
留於河南防剿詎意其入門大肆無禮令人實不能容
欲殺之則不忍欲留之則不敢遂奏其功賞三品銜翎
解回本縣交地方官嚴加管束云

王玉驥傳

王玉驥字雪潭大城人少負異才兒戲卽好爲戰陣之事讀書喜誦孫子十三篇父允文公有疾公請於父曰兒輩讀書將揚名以顯親也然誦讀以求必不可得之虛名何若使我父安心調理乎兒願代父經理鹽務家務事宜聲泣俱下父允其請於是綜理諸務井井有條父卒盡哀盡禮備極哀誠性任俠喜施與廣交納曾出素不謀面之甯晉武姓二十餘年之冤獄暨靜海崔姓之冤獄民以濟困扶危匾額頌之同治中遵例捐都司丁卯秋馬賊蹂躪畿輔公練義勇擊走之又捐巨金助修文廟捐建崇善文社光緒十三年山西太饑人相食

鹽運賀公勸捐助賑公請以四千金捐助鹽院李爲之
奏請二品封典十九年廣平梟匪滋事公帶馬隊十三
名往探日暮猝與匪遇衆寡懸絕公伏兵林中以洋鎗
連環擊之斃匪四十三人俘獲者五十一人餘皆潰散
梟匪悉平二十年倭人入寇有統領武威湘軍魏中丞
光燾請襄軍務邀赴瀋陽公上條陳十則一曰諸軍宜
聯絡一氣二曰派將宜精選所長三曰糧餉宜厚給不
缺四曰軍令宜嚴肅五曰訓練宜精熟六曰偵探宜的
確七曰器械宜犀利八曰軍糧宜多積九曰戰糧宜籌
備十曰用計宜秘密又曰東洋火器最利我軍之器械

不敵也彼之紀律頗嚴我軍之心氣不敵也爲今之計
必自立於不敗之地然後可固其敢死之氣魏公深爲
嘉納於是籌數千金治辦軍火至次年二月初旬自解
騾馬火器赴營行抵天津卽接電報言湘軍於初八夜
在牛莊接仗全軍皆沒公仰天大呼嘔血數斗養疴津
門病日加劇後聞魏公爲李鳳來救出未及於難三月
初一日魏使人來視疾公自知不起亟將經手銀錢清
冊交代轉運局初十日抵家憤惋而卒壽五十有三誥
封武功將軍贊曰

丈夫許國奮不顧身不幸賁志以沒嗚呼悽矣壯士之

志其化爲長虹乎其激爲怒濤乎身雖沒而名不朽公亦可以無憾焉耳或謂公有詩名亦宜垂諸志乘然千秋論定者固在忠義而不在詞章也

孝友志

孔子曰人之行莫大於孝孝莫大於嚴父極其至也
可以通神明而光四海我朝以孝治天下孝治蒸
蒸日上平舒首被聖化孝於親者踵相接卽窮民
無告皆能竭其血性或割股救父或萬里尋親使覽
者天良勃發涕泗交流誠大有助於孝治非徒爲一
邑光也故志之

孝友

明

祝綸父犯罪論死綸堅請以身代遂繫獄妻張氏訴願

代夫死當事義之量減綸罪

郭釗生員事親以孝聞母故廬墓三年父故又廬墓三年

陳霖邑廩生父敬故霖哀毀骨立時值土賊之亂人皆逃避霖獨守墓不去盜稱其孝遺之金帛又值境內大水爲災霖守墓水止墓傍不沒人以爲至孝所感李彪父振歿彪晨昏哭奠守禮不踰匍匐築塋困憊弗恤廬墓三年有翠鳥白兔之集後登耄耄而思親如一日焉

王潤事親至孝父母歿俱廬墓三年後居官時念念恐

忝二人故宦業卓異信乎孝爲百行原也

王夢麒潤子也出嗣仲父兩父歿兩母皆垂白家貧麒月涉星跋交致無缺加之孤姪孀女竭力贍養務極二母之歡心終身不怠

國朝

李汝華李學書孫也歲貢生母王氏事之倍極色養順治二年值水淀土賊蜂起人皆逃避華以母八旬而已亦六旬又乏齋糧因困守廬舍賊至其室者皆義其孝而憐其貧不肯加害會賊火鄰居延及華室華負母出蹶不起母子俱焚死

藺從哲父登第母劉氏俱八十餘從哲竭力奉甘旨不少缺會有寇至跣足負父逃避荆棘中刺足流血不覺痛楚後父患癰親爲吮之不旬日而痊愈胞兄早逝寡嫂無依又撫養其子女婚嫁皆身任之事聞直指給匾曰孝子

張企生善事二親母年老重聽企生虔禱扁鵲祠割腕肉爲藥餌以進母病隨愈里有孝可格神之謠

劉林邑庠生由將材劄任懷來中軍守備善事繼母得親歡心一夜盜劫其家其父遇害痛甚割髮誓報仇後二年署天津守備卽差番丁緝拏果獲劫父夥賊

力手刃之

王慎德庠生事親至孝養生送死盡情盡禮親故廬墓三年明末兵起所至塗炭至其鄉羣相戒曰王孝子家也其勿犯其孝義感人梗頑胥化如此有傳

王照乘性至孝父病刲股代劑父歿廬墓三年有傳

趙曷有傳

鄧曰樛拔貢生夫婦雙孝乾隆年崇祀鄉賢有傳載一

統志

王夢熊幼孤力田奉母自田中歸恐母蹶跌動必扶持婚娶後朝夕依母不入妻室鄉里稱之

楊玉業農少喪父年十三祖母病篤玉禱廟神願以身代回過姚家渡橋落水家人聞信奔救而玉從他處至云在水中似有負之出者方歸祖母病亦霍然

康套初爲傭以養母後爲丐每乞所得必先供母乞少則自枵腹遇歲大饑竟以餓死

田錫華少失怙竭力事母母病嘗糞有傳

孫冠賢有傳

任奎英年三歲父往關東不返及長泣然曰人豈有無父者哉遂出關尋父骨三年始負父骨安葬焉

王榮照有傳